

Na osnovu člana 19. stav (2) Zakona o Vladi Federacije Bosne i Hercegovine („Službene novine Federacije BiH“, br. 1/94, 8/95, 58/02, 19/03, 2/06 i 8/06), Vlada Federacije Bosne i Hercegovine, na 61. sjednici, održanoj 17.11.2025. godine, donosi

ODLUKU
O ODOBRAVANJU PLASMANA SREDSTAVA KOJA SE VODE KOD RAZVOJNE
BANKE FEDERACIJE BOSNE I HERCEGOVINE NA KONTU „OBAVEZE ZA
PRIMLJENE DEPOZITE VLADE FEDERACIJE BOSNE I HERCEGOVINE - KOMISION
FEDERALNOG MINISTARSTVA RAZVOJA, PODUZETNIŠTVA I OBRTA“,

I.

- (1) Odobrava se plasman sredstava koja se vode kod Razvojne banke Federacije Bosne i Hercegovine (u daljnjem tekstu: Banka) na kontu „Obaveze za primljene depozite Vlade Federacije Bosne i Hercegovine - komisijon Federalnog ministarstva razvoja, poduzetništva i obrta“, radi realizacije Programa „Kreditni poticaj razvoja, poduzetništva i obrta“.
- (2) Kreditni poticaji, kao državna pomoć male vrijednosti, će se dodjeljivati na period do sedam godina, s grejs periodom do dvije godine i kamatnom stopom od 0,9%.

II.

- (1) Bitni elementi Programa „Kreditni poticaj razvoja, poduzetništva i obrta“ su:
 - a) Svrha programa: Kreditni program se provodi u cilju pružanja finansijske pomoći subjektima male privrede za produktivnije poslovanje i rast privrednih aktivnosti, a neophodna su im dodatna ulaganja u osnovna sredstva. Dodatna ulaganja će omogućiti pokretanje nove i održavanje postojeće proizvodnje, pružanje usluga, postojećeg broja subjekata male privrede i novo zapošljavanje. Kredit se daje na bazi komisijone kreditne linije koja će se koristiti putem Banke. Do 30 % odobrenih kreditnih sredstava subjekti male privrede moći će koristiti za nabavku repromaterijala.
 - b) Kriteriji za raspodjelu sredstava: vrsta djelatnosti, namjena utroška sredstava, povećanje zaposlenosti, broj zaposlenih, ravnomjerniji regionalni razvoj (stepen razvijenosti JLS), pripadnost ciljnoj skupini i dosadašnji poticaji Federalnog ministarstva razvoja, poduzetništva i obrta (u daljnjem tekstu: Ministarstvo) u posljednjih pet (5) godina.
 - c) Kategorija korisnika sredstava: subjekti male privrede definisani po Zakonu o poticanju razvoja male privrede („Službene novine Federacije BiH“, broj: 39/24), registrovani u skladu sa Zakonom o obrtu i srodnim djelatnostima u Federaciji Bosne i Hercegovine („Službene novine Federacije BiH“, broj: 75/21) ili Zakonu o privrednim društvima („Službene novine Federacije BiH“, br. 81/15 i 75/21), koji imaju sjedište na području Federacije Bosne i Hercegovine, te imaju najmanje 2 (dva) zaposlena na neodređeno vrijeme.
- (2) Kreditna sredstva se neće dodjeljivati privrednim subjektima koji djeluju u sektorima primarne poljoprivredne proizvodnje, primarne proizvodnje proizvoda ribarstva i akvakulture, za djelatnosti povezane s izvozom u slučaju da je pomoć direktno povezana sa izvezenim količinama, kao i u drugim djelatnostima i pod uslovima koji su propisani članom 4. Uredbe o uslovima i postupku dodjele pomoći male vrijednosti-de minimis pomoći („Službene novine Federacije BiH“, broj: 22/25).

III.

- (1) Javni konkurs za dodjelu finansijskih sredstava iz tačke I. ove odluke raspisuje Ministarstvo, a objavit će se u „Službenim novinama Federacije BiH“, na web stranici Ministarstva i u najmanje dvoje dnevne novine dostupne na teritoriji Federacije Bosne i Hercegovine.
- (2) Zahtjevi za dodjelu kreditnih sredstava podnose se Ministarstvu. Obradu zahtjeva će vršiti komisija koju imenuje federalni ministar razvoja, poduzetništva i obrta. Imenovana komisija će sačiniti smjernice za podnositelje projektnih prijedloga, te na osnovu kriterija za izbor programa iz tačke II. stav (1) ove odluke, javnog konkursa i Pravilnika o postupcima u provođenju programa razvoja male privrede („Službene novine Federacije BiH“, broj: 104/24), utvrditi rang-listu potencijalnih korisnika kreditnih sredstava. Sa utvrđene rang-liste potencijalnih korisnika kreditnih sredstava, Ministarstvo će dostaviti Banci podnesene zahtjeve za dodjelu kreditnih sredstava na dalju obradu, u skladu sa procedurama Razvojne banke.
- (3) Konačne odluke o dodjeli kreditnih sredstava donosi federalni ministar razvoja, poduzetništva i obrta.
- (4) Rezultati konkursa objavljuju se u „Službenim novinama Federacije BiH“ i na web stranici Ministarstva.
- (5) Razvojna banka će zaključivati ugovore o dodjeli kreditnih sredstava s korisnicima kredita, kao i osiguranje kreditnih sredstava. Ministarstvo će vršiti nadzor i provjeru namjenskog utroška kreditnih sredstava od strane korisnika kreditnih sredstava, u saradnji s Bankom.

IV.

O utrošenim sredstvima iz tačke I. ove odluke Ministarstvo će izvještavati Federalno ministarstvo finansija/Federalno ministarstvo financija, a Federalno ministarstvo finansija/Federalno ministarstvo financija Vladu Federacije Bosne i Hercegovine u skladu sa Zakonom o budžetima u Federaciji Bosne i Hercegovine („Službene novine Federacije BiH“, broj: 102/13, 9/14 – ispr., 13/14, 8/15, 9/15, 102/15, 104/16, 5/18, 11/19, 99/19, 25a/22).

V.

Ova odluka stupa na snagu narednog dana od dana objavljivanja u „Službenim novinama Federacije BiH“.

V. broj: 1682 /2025
17.11.2025. godine
Sarajevo



PREMIJER
Nermin Nikšić